

四庫全書

史部

欽定四庫全書

史部

硃批諭旨卷一百二十六之十六

臣 永瑤恭校

編修_臣 裘謙覆勘

總校官中書_臣 朱 鈐

校對官中書_臣 王鍾泰

謄錄監生_臣 陸潮愈

欽定四庫全書

硃批諭旨卷一百二十六之十六

硃批田文鏡奏摺

雍正七年四月二十七日河東總督臣田文鏡謹
奏為恭報河東得雨日期仰慰

聖懷事雍正七年三月十二日以前河東兩省所得時
雨分數日期已經具摺恭

奏伏查豫省自三月十二日以後至三月二十一

及四月初五十一等日據河南南陽汝寧三府及
陳許禹鄭光汝陝七州各屬具報得雨入土二三
四寸不等惟開歸彰衛懷五府屬報雨多寡不同
內有僅得微雨入土未深而四月初旬又遇風沙
近省各屬及河北一帶稍覺缺雨臣屢差人四處
到鄉查視據云上年三冬連日雨雪今春正二三
月又獲雨雪霑足土膏潤澤麥根深固惟最高阜
處及沙土地內當此二麥穎粟秋禾生長之時稍

覺微乾臣即於四月十一日起禁止屠沽虔誠祈
禱謹率在城文武步行

龍神廟中早晚祈求并飛檄各屬雨未霑足之州縣
一體虔禱數日內僅獲微雨未克深透臣又於十
九日擇吉薰壇連日虔禱嗣據歸德府各屬具報
二十日得雨三四寸不等茲於二十六日開封省
城濃雲四布密雨普降自卯時起至二十七日寅
時止據祥符縣報稱入土已經霑足不但二麥愈

滋堅實其秋禾穀黍高粱花豆等苗亦皆滋雨暢
茂歡呼之聲遍於城野除豫省各屬得雨分寸俟
具報到日再行奏

聞外恐厯

聖懷合將開封省城得雨日期先行恭

奏再東省自三月二十一及四月初十十一十二
等日據各屬具報得雨三四寸至五六寸不等但
目下曾否得雨因地方遼濶報到稍遲未能全悉

合併

奏明為此謹

奏

前聞豫省缺雨而衛懷一帶尤甚朕心日夜為之憂虞
茲覽所奏開封等處得雨透足雖云稍慰其餘各府州
尚未知曾否沾被料今歲二麥失收矣去冬今春以來
觀卿奏報雨雪之摺以為豐收可必似有滿足之意朕
於彼時即不以為然今果如是所以

天工之事惟宜以敬誠處之切勿預期一歲功畢方敢釋懷此念絲毫不可肆也當誌之

同日又

奏為據實奏

聞仰請

聖裁事竊查山左濟東一道分守二府三州管理通省驛務有稽察屬員督修水利清查馬匹錢糧之責非精明強幹之員弗克勝任茲該道張體仁性本

忠厚才欠優長到任以來並無設施不聞整頓於
濟東道缺頗不相宜且訪得張體仁之父現在濟
南府雒口行鹽查係伊家舊業引課經手多年原
非為張體仁官於濟南而起但張體仁前為濟南
府知府今又蒙

皇上天恩補授濟東道

聖明在上該道自可據實詳明

奏懇

聖恩另補他處始為臣子善處之道今張體仁身為監司伊父即在治下行鹽雖無招搖之處而嫌疑所在未免有礙於官聲也可否仰請

皇上擇京官閒簡之缺以張體仁調用其濟東道缺另簡賢能之員補授則不獨於伊父行鹽並無妨礙而張體仁身為閒曹亦可充供厥職矣再張體仁現在奉

旨監督廟工倘蒙

俞允并請

皇上將張體仁以京官職銜令其在工監督俟告成之日再行進京補用則監督既有專司驛道又有專任均無顧此失彼之慮臣仰體

皇上軫念臣工委曲成全之

聖意是以冒昧陳請伏候

聖裁為此謹

奏

張體仁非短於才之人或觀望不前不肯盡力供職乎
現任部郎內如張體仁者有幾頗多不及也監司之任
綽然有餘東省各員中朕尚將伊置於第一第二之列
卿再加試看自知至於其父在治下行鹽乃屬小節若
調補豫省道職就近驗視猶或庶幾內調閒曹殊覺可
惜

同日又

奏為遵

旨商酌據實覆奏事雍正七年四月二十二日據河北鎮臣閃文黼咨呈攜帶兵丁一案內開欽奉

硃批諭旨所奏與督臣田文鏡妥商但書算之人亦何用許多至云差遣不過隨滿營大兵而行並無分外使令處也多帶一人未免多汝一人之累其酌量為之欽此臣查

國家設兵有制用兵亦有制各營兵丁調遣之外俱有防汛差操之責非可以供使令而效奔走也今

閃文繡以書算差遺之人欲攜帶兵丁不知書算
非兵丁所諳之事兵丁非可供書算之人則書算
原不必攜帶兵丁也臣伏讀

諭旨不過隨滿營大兵而行並無分外使令處也則閃
文繡到彼既無分外差遣又無庸攜帶兵丁且現
奉部文總兵帶跟役二十四名并給以口糧鹽菜
銀兩及馱馬等類皆

聖主格外施恩令其多為隨帶則跟役之中即可脩書

算差遣之用閃文繡欲帶書算之人應在本衙門
書辦內選擇諳練寫算者酌帶三四名以為跟役
足資辦理更無庸分外攜帶兵丁也臣欽遵

諭旨即將無庸攜帶兵丁緣由并跟役中可帶書算之
人等語照會鎮臣閃文繡在案所有商酌事宜理
合據實覆

奏臣再有

奏者閃文繡到任以來辦事勤謹操守廉潔整飭營

伍訓練兵丁俱各盡心克供厥職今蒙

皇上命其統領兵丁但臣伏念統領兵丁與鎮守不同
必識見過人處事決斷始為智勇兼全之將如此
番調遣車兵事宜俱蒙

皇上指示詳明區畫盡善又復

恩賞屢加至優極渥乃閃文繡奉文之後臣見其事多
游移胸少成竹則閃文繡為人止可以奉號令遵
約束非有經緯之材運籌之畧也臣受

皇上深恩稍有所知不敢隱默是以冒昧具

奏伏乞

聖鑒謹

奏

議論可謂公當之至閃文繡原屬一介武夫止堪聽受
指揮而已此等才畧豈可委以運籌之任乎

同日又

奏為敬陳東省事宜請

敕道員分審叅案以清積牘以資吏治事竊臣以菲材

仰蒙

皇上殊恩畀以總督河東重任東省錢糧又奉

旨命臣主張料理夙夜兢惕寢食靡遑伏念東省吏治

亟湏極力整頓東省錢糧亟湏徹底清查東省虧

空亟湏究追彌補東省積案亟湏催督清完其他

應行料理之事不一而足如整頓吏治必首嚴貪

劣重懲衙蠹臣是以留心察訪一經得實即官叅

役拏執法審究臣又欽遵

聖訓諄諄教導俾各革面洗心奉公守法近來官役稍知儆惕矣各府州縣倉庫前經委員分頭盤查誠恐彼此徇隱虧實混淆今又會同署撫臣岳濬將到任一年以上之州縣

題請錯綜調補各各交盤務使官侵民欠絲粟必得確實以冀漸次清理矣至已審結虧空各案大率有勒追之名無完補之實其中恐有隱匿寄頓承

追不力之弊今已委員提犯嚴訊務使一一究出
以抵虧項毋許任其延挨支飾矣此東省吏治倉
庫虧空臣之現在料理者如此總因廢弛已久驟
難見效然臣蒙

皇上委任隆恩惟有力圖整飭不敢因其難而稍存苟
固不可因循亦不宜急促次第整理自然就緒

且因循之念也臣又查東省積案頗多不可不亟
為清理如已叅之虧空未審題者現有在平縣草
職知縣馬嵩等九案已叅貪劣之員未審題者現

有濰縣草職知縣袁登陞等二十案其他命盜等
案難以枚舉在布政使費金吾前署按察使鹽運
司唐綏祖感激

天恩未始不竭力辦理竭力催督而臣亦時刻嚴飭無
如東省官玩役疲積習未能驟改非幾經駁飭則
案情未得非挨至臨限則任催罔應是以案牘每
多壅滯前河南按察使公元奉
旨調補山東臣於其起身之際欽遵

諭旨諄諄教導詳細指示該司感荷

聖恩亦自勇往向前力圖報效但甫經到任土俗民情
尚未熟悉各案原委亦未深知現今積案既多又
屆辦理秋審一日之工夫有幾一人之心力有限
若非將現在之積案分委賢員急為清理恐日復
一日愈積愈多非所以仰體

皇上委任微臣整頓之

聖意臣查鹽運司唐綏祖才堪任用人尚勤慎諸凡案

件實能詳審伏乞

皇上天恩將以上未經審結虧空貪劣等二十九案著
令唐綏祖勒催承審府州縣審解該運司確審招
解俟督撫題結之後令該運司將卷宗交該藩臬
衙門存案其有應追銀兩仍令藩臬二司督追完
解其現今

題叅未經奉

旨之案及嗣後續叅之案仍照舊例歸藩臬二司會審

如此則不但按察使公元得以專心辦理現審命盜等案及秋審事宜積案可以一清而布政使費金吾亦得省此會審叅案之心思可以悉意助臣清理錢糧稽察庶務鹽運司唐綏祖於各案情節亦頗知悉似亦駕輕就熟實於東省錢穀刑名吏治均有裨益臣因

題叅奉

旨敕審之案有關錢穀刑名例應藩臬兩司會審招解

臣未敢擅委該運司審理是以不揣冒昧恭摺

奏請伏乞

皇上睿裁施行謹

奏

分委代辦以清積案此議甚是照所請行咨明該部存
案可也

雍正七年五月初四日河東總督臣田文鏡謹

奏為恭報豫省得雨日期仰祈

睿鑒事竊查雍正七年四月二十六七兩日開封省城
得雨業經臣將入土霑足緣由并二麥秋禾情形
具摺恭

奏茲據通省各屬所報二十六七八等日各得甘雨
八九寸盈尺不等入土深透自二十九日後天氣
連日晴霽二麥正在刈穫現據陳汝二州祥符寶
豐伊陽等縣報到分數俱有八分九分十分不等
容俟各屬報齊再當奏

聞秋禾得雨之後愈覺暢茂異常官吏軍民咸歌

聖澤農商工賈共祝

皇仁是

上天之雨露皆

聖主之恩膏也再東省得雨日期尚未全報俟報到日
採訪山東雨水情形甚屬調勻豫省大河以南地方亦

容臣另摺恭

然惟河址三府少差云云果如此否
奏外所有豫省得雨日期分數理合繕摺奏

聞仰慰

聖懷為此謹

奏

覽

同日又

奏為遵

旨密覆事竊查雍正六年八月二十四日奉到奏摺一

扣內奏山東濱州董姓習為竊盜一事欽奉

諭旨董姓一家聞自前明以來久積穢行其宗族中不

乏衣冠人物而乃暗為寡廉鮮恥干犯功令之事竟
習以為常斯言非出自無稽宵小之口似乎確鑿不
誣卿其加意精詳體訪如得有實據徐徐設法懲治
鋤莠淨盡斯良苗滋長也朕恐風聲洩漏未經更諭
一人密之欽此臣遵即密遣精細的當人加意察訪
嗣於臣赴東省會審黃炳一案臣亦時刻留心密
訪查濱州董姓固屬族盛丁繁散處境內亦多生
監但求其實據尚未有得臣恐一人耳目察訪未

周又不敢稍有洩漏是以臣去歲回豫時作臣有所聞面囑山東署臬司唐綏祖密為察訪并切諭一字勿露茲於雍正七年二月二十八日據唐綏祖密稟近訪拏得窩匪窩娼之董興野董竹卿二人現在發州嚴審然亦係該州退役捕快並非衣冠人物臣令其再為密查外臣又於屬員內有山東人現在豫省為官辦事勤慎不避嫌怨之員亦作臣有所聞令其察訪俟一有實據容臣恭摺具

奏臣受

皇上高厚隆恩兼轄山左稽查地方是臣專責敢不留
心訪察使不肖之輩洗心革面均為

聖世良民緣係奉

旨事理理合先行覆

奏仰祈

睿鑒謹

奏

前旨有云斯言非出自無稽宵小之口今其人已故何妨明諭卿知但仍湏密之勿令匪類結怨於地下之人此事從前乃何世璠所奏因本籍山左所以知之甚確何世璠為人老成端方斷不至有誣陷欺罔以伸報復之理徐徐詳加察訪不可委託多人聞此族類為匪已久自前明迄今世代相承踪跡巧而且密泛泛訪詢萬難探其脈絡倘若覺卿察訪又加一番詭秘斂跡深藏則更無從發擿矣然非急務惟宜緩圖

同日又

奏為車騎兵丁起程日期仰祈

睿鑒事竊查車騎兵丁一案於雍正七年三月十七日
接准部咨經臣將辦理事宜逐一摺奏欽奉

硃批交怡親王等議覆有旨諸凡事宜總俟部文到日
遵照奉行欽此臣節奉部咨逐一遵照敬謹料理茲
於四月二十四日經臣將車騎兵丁在省城再加
驗看親自查照凡器械旗幟衣甲壯帽行裝等項

無不齊全足用此皆仰賴我

皇上不惜帑金富足給與是以諸務畢備軍容整肅而將備千把兵丁等俱蒙

皇上隆恩疊沛厚澤頻頒官升

賞以二年之俸薪兵丁

賞以額外之銀兩路費另給沿途之需用咸周行裝畢倘家口之養贍並足是以各營兵丁感激

天恩親詣臣轅紛紛遞呈并據鎮標呈懇

題謝臣又將

皇上愛養弁兵恩施無已之

聖意宣布曉諭俱各踴躍歡呼於四月二十六日陸續
起程訖臣又飛檄沿途州縣出示曉諭客店買賣
人等多備食物照常生理不得高擡時價以便兵
丁分隊住宿購買無缺又嚴飭管押將弁約束兵
丁亦不得絲毫擾累百姓復委員沿路稽查現據
稟報兵民安帖行住肅然除弁兵恭謝

天恩臣現在繕本代

題外所有兵丁起程日期理合恭

奏其東省車騎兵丁起程日期據署撫臣岳濬咨稱
於五月初六日自省陸續起程合併奏

聞謹

奏

據奏車騎兵丁業俱起程途間行住安帖甚好知道了

同日又

奏為欽奉

諭旨委員確勘道路事雍正七年四月二十九日奉到
怡親王暨大學士等公札內開雍正七年四月初
七日奉

上諭山東為南北通衢自德州劉智廟以至紅花埠驛
幾及千里歷年以來輪蹄踐壓致蕩平大道漸成溝
塹其津澗橋梁亦多傾圯一遇夏秋之交山水偶發
行人坐守時日而窪澇之區積潦成河旅客苦於渡

涉朕心深為軫念但此通行之路已久成低下勢難
培築增高若於大道之旁擇高阜之處另開一道似
屬有益前已降諭旨令工部侍郎法保等於今年夏
秋之交自京師起程由直隸至江南陸路大道沿途
踏勘但非地方官先為詳看恐未能詳察情形爾等
可寄字與田文鏡著先即遴委賢員將山東境內南
北經行之路相度地勢別開新道其有借用民田者
照原價補還銀兩仍豁除糧賦其有繞行之處與舊

道相遠者至頓宿之地仍應引歸以便行客投宿旅店至有應建橋梁及應疏濬水道之處詳悉踏勘俟法保等來會同商酌繪圖呈覽估計具奏欽此欽遵臣伏思南北大路乃旅客往來之所自應地方大吏平日飭令屬員不時查勘遇有低下之處相機料理或培築增高或另開新道津澗橋梁應否修建疏濬均應查勘如需費無多捐資修理倘需用浩繁

奏請動用公項修治乃臣並未預籌致上煩

聖慮臣忝任封疆曷勝惶悚茲蒙

皇上不加譴責著臣遴委賢員詳悉踏勘臣查新經調
補登萊青道孫蘭芬幹練勤謹隨委其速至東省
詳悉查勘並將欽奉

諭旨內事理逐一指示令其細加踏勘繪圖估計具報
俟

欽差至日會同定議具

奏臣又諭孫蘭芬遇有舊路平正可以修理無庸另
開者亦須敬謹斟酌明白聲說以便查核奏請除
道路情形俟孫蘭芬到東踏勘後容臣恭摺奏
是聞外所有遵

旨委勘人員理合先行覆

奏伏乞

聖鑒謹

奏

平治南北通衢地連數省非一府一州汝等督撫所能專擅之事何惶悚之有俟秋間欽差到來會同詳議具奏可也

同日又

奏為遵

旨斟酌東省耗羨據實覆奏事雍正七年二月二十一日據山東署撫臣岳濬札內開經手耗羨收支存貯各款逐一繕冊具奏恭請

聖裁欽奉

硃批諭旨命岳濬與臣斟酌料理又巡撫衙門支耗各

條復奉

硃批亦與臣商酌欽此臣查歸公耗羨動關

國帑凡有公務必須斟酌咸宜奏請

睿裁然後動用今據岳濬原冊內有未經奏明但據屬
員詳請巡撫竟批司支給者有奏明動用正項經
部議核減而巡撫仍將公項補給者有地方細微

之事而亦動用公項者臣思地方公務果當辦理
自應

奏請

皇上至聖至明無不

俞允若擅行支給將來必有不當用而用者各屬混行
詳請巡撫擅為批給使庫帑任意花銷其風殊不
可長且不肖官員倘有侵那虧空將來上下交通
即可借此掩飾亦未可定此未經

奏明而擅行批給之不可也至於動用錢糧最嚴浮
冒如果無浮冒難以核減自可據實覆部如果有
浮冒自應核減豈可以正項核減仍以公項補給
是名減而實不減在

朝廷何必居此核減之名部臣又何必有此核減之議
此既經部議核減正項而仍將公項補給之不可
也若夫地方遇有公事如果需用浩繁自應奏請
動支耗羨若事屬細微需費無多地方大小各官

即可量行捐給乃毫釐必動用公項殊為未協且
此項支用若不奏

聞則為擅給必一一奏

聞又覺煩瑣此亦臣愚之所為不可者也冊內款項甚

多臣不敢逐一瑣陳惟擇其大畧則不越乎三者

臣謹據已見條析如左至於巡撫衙門應支耗羨

各條臣亦敬謹商酌應取用者自應取用以仰副

我

皇上軫念臣工委曲詳盡之

聖意臣業將東省耗羨冊逐條粘簽何者應用何者不
應用或照豫省之例以期畫一或仍東省之例量
行料理於三月二十一日移送山東署撫臣岳濬
在案所有遵

旨斟酌料理事宜理合據實恭

奏為此謹

奏

所議俱屬是當之極嘉悅覽焉

同日又

奏為

聖恩高厚難名微臣感激無地恭辭增給養廉仰懇

俯准事雍正七年四月二十四日准山東署撫臣岳濬

咨內開臣總督山東事務繁劇兼以統轄武弁時

有賞勞之需請

旨添給臣養廉銀一萬兩欽奉

硃批諭旨是欽此等因到臣臣隨恭設香案望

闕叩頭謝

恩訖伏念臣起家寒微忝叨養廉祿虛糜涓埃莫效
此臣所夙夜疚心刻不自安者也今署撫臣岳濬
請於山東耗羨項下添給臣養廉銀一萬兩在岳
濬因臣硃批不使臣知而我

皇上體下

恩隆遂

賜允准臣聞

命之下悚惶無地但臣在豫省每年於司庫耗羨內支
領養廉銀二萬八千九百餘兩實屬俯仰從容公
私給足今雖事兼兩省而家口猶是食用猶是即
偶有犒勞儘足敷用茲東省此項若欽遵祇領則
臣之受

賜倍多而臣之抱歉倍深且臣蒙

皇上天恩實逾常格果若資用不敷即當自行懇請焉

敢復於

天地父母之前稍存矯激欺飾之念臣除現在咨覆岳

濬毋庸飭司支給外謹當繕摺恭辭伏乞

皇上俯賜允准庶微臣犬馬之心得以稍安而

聖主體恤之恩益難名言矣抑臣更有請者豫省各州

縣自雍正六年蒙

皇上天恩加給養廉已為優裕惟查豫省糧儲道每年
養廉銀三千二百餘兩管河道每年養廉銀二千

八百餘兩河北道每年養廉銀三千兩南汝道每年養廉銀二千八百餘兩但各道有巡歷地方盤查倉庫點驗驛馬閱視堤工之責道路往來時有所費所支養廉似欠寬裕是以臣前與署撫臣岳濬酌議東省各官養廉每道俱議給四千兩荷蒙皇上允准在案臣不揣冒昧敢乞

皇上將豫省各道於現給養廉外每員每年加給一千兩請於雍正七年為始在司庫耗羨內按季支給

則各道均沐

天恩於無既矣是否允協臣未敢擅便伏乞

聖裁總之臣受

皇上深恩無事不據實直陳在臣之養廉既屬有餘不

敢不辭在各道之養廉既有不足不敢不請是以

繕摺具

奏仰祈

睿鑒為此謹

奏

岳濬初次議奏東省各官養廉時朕命與卿商酌而不
令言及加卿養廉者蓋為卿不便自議自加也此番添
給之議實奉朕命而非出於岳濬之意何乃如是堅辭
耶卿其再行酌量若領受此項於諸凡用度寬裕從容
則不必過辭以蹈矯廉之迹再者因見前摺所議東省
道員養廉多於豫省正欲遇便詢明今奏請加給豫省
各道甚屬允協況朕從前曾經有諭耗羨既饒不須儲

蓄盈溢當議增屬員養廉此請與前旨相符照數加給可也至於府州縣各員未知較東省多寡若何亦應籌酌畫一務俾相去不遠方為均平得當

雍正七年五月初十日河東總督臣田文鏡謹

奏為恭報豫省二麥收成分數并河東兩省得雨日期仰祈

睿鑒事竊查雍正七年四月二十六七八等日豫省各屬得雨分寸暨二麥刈穫緣由經臣兩次恭摺奏

聞茲二麥登場據開封等八府屬暨陳許等七州并所屬各報二麥收成自十分以至九分八分七分不等因各州縣間有沙土瘠地其收成稍次於平原沃壤各屬以該管通計故報有七八九分不等其實各屬平行地畝實有十分收成再秋禾穀黍高粱花豆等苗自四月二十六日得雨後於五月初四日又據各屬具報得雨入土二三四寸不等秋禾益加茂盛此皆仰賴我

皇上至誠至敬感召

天和是以二麥豐收盈寧共慶臣不勝懽忭之至再東省
於四月二十二十一二及二十六七八等日據各
屬具報得雨入土三四五六寸不等其二麥秋禾
情形臣詢東省往來之人僉云秋禾暢茂二麥結
實甚好其收成分數俟報到日容臣另摺恭
奏外所有豫省二麥收成分數并河東兩省得雨日
期理合繕摺具

奏仰慰

聖懷謹

奏

覽豫省二麥收成分數并兩省得雨日期朕懷曷勝欣
慰初聞河北地方膏澤稍缺頗深憂慮豈料麥秋收穫
如是耶朕意分數即較此畧減亦係極好消息何則豫
屬豐見豐熟準之

天地循環之理太過須防不及今歲此微少欠方與周易

損益盈虛之道不相違忤來年又可希冀盈寧也

同日又

奏為奏

聞事竊惟我

國家統一寰區聲教廣被是以萬邦向化重譯來朝
我

皇上優待遠人體恤備至一切夫馬船隻令各省給以
勘合應付於柔遠之道至矣極矣今臣訪聞得遲

羅國貢使四員自廣東由山東赴京進

貢廣東省給發勘合差順德縣巡檢陳珪伴送於本年四月十七日進山東滕縣界四月二十七日在東平州逗留三日始行聞其勘合二道共夫二百六十四名馬二十八匹今經過州縣先有傳單一紙傳知前站用夫二百五十名較勘合少十四名馬四十疋較勘合多十二匹額外用車二十五輛又每站需索上席四桌下席十桌前站三人銀三

兩象奴三人銀三兩二錢等費臣念遠使感荷

聖化輸誠進

貢所至之處自必奉法惟謹今於勘合之外多索車
輶酒席等項在貢使遠人何由而知此皆通事及
伴送人員等借名需索擾累地方者也臣忝任封
疆既有所聞不敢不據實奏

聞為此謹

奏

察漕御史旋京業據奏聞即命其具疏糾叅矣續接此奏嘉悅覽之舉凡外任大臣人人咸肯如此據實入告則凡無知妄為之輩莫不屏氣斂迹孰敢肆行無忌耶候另有諭旨

雍正七年五月二十一日河東總督臣田文鏡謹奏為恭報東省二麥收成分數仰祈

睿鑒事竊查雍正七年五月初十日經臣將豫省二麥收成分數恭

奏在案茲據東省各屬具報現今二麥俱已登場其收成分數自十分九分以至八分七分不等理合

據實恭

奏仰慰

聖懷惟據青州府安邱縣報稱五月初七日雷雨近城地方下有冰雹二麥秋苗有無被損現在確查另文申報等語其被雹地方寬長若干未據聲明臣當即檄行布政司委員速行確查詳報外合先奏

聞但臣思此時二麥刈穫居多諒無妨礙即秋禾或有
被損尚可再為播種俟確報到日另摺恭

奏再豫省於五月十七八九等日據開封衛輝彰德
陳州各屬俱報得雨入土三四寸四五寸不等相
應一併奏

聞伏乞

聖鑒謹

奏

今歲直隸各省雖不為旱大都雨水欠足從來物極必反春末夏初既苦恒暘夏末秋初或恐霖潦不免也一切河工隄岸之防護俱當綢繆於早加倍慎重將朕此諭轉傳河臣嵇曾筠暨大小河員悉令知之

同日又

奏為欽奉

上諭事雍正七年五月初六日據提塘官黃震齋到內閣大學士移會內開雍正七年三月二十四日內

閣奉

旨所有頒發上諭每省應發若干爾等酌量頒發令該督撫將軍提鎮等轉飭各屬廣行宣布務使窮鄉僻壤家喻戶曉欽此欽遵等因計頒發到臣一本河道總督一本副總河一本學政一本河北南陽總兵各一本布政司一本樣本二本按察司一本臣隨躬率在城文武各員出郊跪迎至署恭設香案望闕叩頭宣讀訖竊惟

君臣者天地之常經忠孝者生人之大義我

朝自

太祖

太宗

世祖

聖祖積德累功久安長治我

皇上克紹鴻基

龍飛御極

天心協應疊見嘉祥凡含生之類負氣之倫莫不尊

君親上共遊於光天化日之下矣不意有大逆不道如

冒靜等者背理逆

天造言侮

聖肆為誣謗之詞極其悖逆之語狼嗥犬吠實何異是
即寸磔以謝天下猶不足以洩神人之憤快臣庶
之心乃我

皇上本覆載之公行神聖之事光明正大日月莫踰至

孝純忠

天

祖共鑒薄海內外固無不共見共聞共知共信今蒙

皇上頒發

聖諭布告天下煌煌

天語揭至公無我之心洋洋

聖謨昭地負海涵之量惟是臣跪讀之下實不禁切齒

痛心背裂髮指恨弗食其肉而寢其皮也謹將頒

到

上諭十本隨即分發各衙門并飭令布政司照式刊刻
廣行宣布則凡逆賊輩之居心行事在窮鄉僻壤
平日之未克周知者莫不家喻戶曉斯綱常之大
義以伸而普天之公憤亦洩矣所有奉到緣由理
合繕摺恭

奏伏乞

聖鑒謹

奏

既遇此種怪物不得不有一番出奇料理傾耳以聽可也

同日又

奏為豫省辦理車騎事宜動用耗羨銀兩據實

奏明仰祈

睿鑒事竊照車騎兵丁一案臣節奉部咨逐一遵照料理於雍正七年五月初四日經臣將兵丁起程日

期恭

奏在案至辦理各項動用銀兩之處臣查前後部文有行令在藩庫銀兩內動支者有行令在公項內給發者臣伏思正項錢糧與公項銀兩均屬

朝廷庫帑而前後動用銀兩同為一案是以臣飭令布政司一併在於公項內動支給發除將動用細數造冊送部外所有車騎案內辦理各項并動用雍正七年分貯庫耗羨銀兩數目臣謹條析另摺恭

奏伏乞

聖鑒謹

奏

仍照原議賞賜兵丁銀兩支給將弁俸薪皆動用正項
錢糧其將弁至京路費暨製造棉甲備辦行裝雇騾等
務俱動用公項銀兩如此方與他省畫一雖云均係庫
帑其實大有不同遵旨行毋違

同日又

奏為恭報動存耗羨銀兩數目仰祈

聖鑒事竊查豫省自雍正二年起至雍正五年所有收過各年耗羨銀兩并動支數目業經臣節次恭摺奏

聞茲據署布政使謝旻造冊詳報內開雍正六年分原貯司庫各年耗羨共銀五十萬四百二十一兩零又自雍正六年正月起至歲底止新收過各年耗羨并歸還原款共銀二十六萬五千六百五十兩

零新舊二項共銀七十六萬六千七十一兩零內
除起解各部補平幫費等銀暨布政司詳明臣衙
門存案動支過各官養廉并各項應需用銀共一
十六萬二千六百五十八兩零實在貯存司庫各
年新舊耗羨共銀六十萬三千四百一十二兩零
所有雍正六年分貯存動支過新舊耗羨銀兩年
款數目理合恭繕細摺一併據實奏

聞仰祈

聖鑒謹

奏

卿料理一應錢糧事件考核精明出納妥確朕實篤信
無疑此奏不過閒覽耳應咨部者仍照例咨部存案備
查

同日又

奏為欽奉

聖訓據實覆奏事雍正七年五月十三日臣家人齎回

臣恭報河東得雨日期摺內奉有

硃批諭旨仰見我

皇上朝乾夕惕敬

天勤民之念無時不存

聖德高深非臣愚所能仰窺萬一又蒙

聖訓諄諄以敬誠垂誠臣跪讀之下感悚交集竊查豫

省自本年三月十二日以後河北一帶稍缺雨澤

然賴去冬以至今春二三月雨雪深透土膏滋潤

雖覺缺雨實不為旱自四月二十六七八及五月初四等日通省各得大雨後現今二麥俱已收穫訖臣遍加察訪委無失收之處臣恐上厯

聖念隨經陸續恭

奏在案現今市集麥價據各屬俱報比前日減且今歲近京地方雖不為旱頗覺晴多雨少及二麥收割之後二麥刈穫之後收穫乾燥籽粒堅實據農民鋪之役亦俱報稱籽粒充滿勝於往年云云或係蒸曬之功所致歟戶人等俱云得麩頗多臣再查豫省沿河灘地所種麥禾向來每被水淹近賴

皇上福庇河流循軌中泓刷深桃汛以來水勢平穩其

從來

各處支河臣會同河臣嵇曾筠槩行堵築是以沿窪下之區與旱相宜沿河灘地倍收是乃自然之

理也

皇上軫念民依至意不得不煩瑣瀆陳仰慰

聖懷至於敬誠之心刻不可懈滿假之念刻不可存臣

益當謹誌

聖諭服膺勿失焉耳又於臣具

奏濟東道張體仁摺內奉有

硃批諭旨伏念臣一介庸愚荷蒙

聖恩總督河東察吏安民時刻在念是以偶有所知無

不入

告茲欽奉

諭旨遵當再為試看若夫豫省道員糧儲道張建德有

辦漕之責管河道祝兆鵬河北道朱藻有河防之

任南汝道缺業經臣

奏請以登萊青道李英調補蒙

皇上俞允在案均未便將張體仁調補且張體仁在東省亦係臣所轄惟有留心試看以仰副我

皇上愛惜人材之

好

聖意所有奉到原摺理合恭繳謹

奏

覽

雍正七年六月十五日河東總督臣田文鏡謹

奏為恭報河東兩省得雨日期仰祈

睿鑒事竊查豫省開封衛輝彰德陳州各屬於五月十七八九等日得雨分寸經臣具摺恭

奏茲據歸德河南懷慶南陽汝寧五府屬及光汝許禹鄭陝六州并所屬續報五月十七十八十九二十七二十九等日各得雨入土三四五寸不等茲於六月初二初六初七初八等日又據各屬具報得雨入土七八寸盈尺不等臣於六月十一日親至郊外閱視禾苗查看得高粱高有八九尺不等

穀黍高有二三尺不等俱有吐穗者其芝麻花豆
等苗高有七八寸及尺餘不等均極暢茂晚禾播
種之後高出地上亦有五六寸不等兼之連得時
雨土膏滋潤臣又遍諭農人宣揚

聖德勸令勤加耘耔百姓感戴

皇恩歡呼載道臣職任封疆雖心為慶幸亦不敢預為
卜度惟有欽遵

訓旨必敬必誠以待至秋成焉耳再東省於五月初七

初八十七十八十九等日據各屬具報得雨入土
三四五寸不等其六月初旬得雨俟報齊日容臣
另摺恭

奏外所有河東兩省得雨日期理合繕摺奏

聞仰慰

聖懷為此謹

奏

覽奏河東雨澤情形朕深為慰悅然

天工人事更變莫測秋成尚早何敢預必敬誠以待四字時刻在念而已

同日又

奏為公項動款既繁內部冊檔宜備謹擬一併造冊報部以重庫帑仰祈

聖裁事竊查豫省錢糧耗羨一項自雍正二年起至雍正六年歲底計此五年之內動用耗羨各款有經前撫臣石文焯及臣奏明歲有常額者有經臣隨

事斟酌臨時奏請者有事屬瑣屑不敢屢瀆

聖聰彙於歲底奏

聞者但歷年動用各款惟事經內部者於事竣後將動
用之數咨部備案其餘槩未咨部止於歲底奏報
動用存留摺內一併奏

聞臣伏思司庫公項銀兩即與

國帑無殊在我

皇上覆載為量

諭令不必奏銷而臣子經理其事不可不與

國帑同其慎重況同一動用公項而有咨部不咨部之分則事不畫一且存庫之數歲有所增動用之款歲無一定為經久之計杜侵混之弊不可不使內外均有檔案以備稽查也臣愚以為應將雍正二年起至雍正六年歲底動用及存庫耗羨銀兩挨年分款彙造一冊咨部備案其自雍正七年起凡有臨時辦理公務奏請

允准動用耗羨者即於奉

旨後隨事咨部其餘統於歲底繕造四柱冊摺一面具
奏一面報部庶已用之銀兩内外有案可稽而現存
之庫帑絲毫致不致侵冒倘蒙

皇上俞允其東省動用公項銀兩臣擬知會山東署巡
撫布政使臣費金吾亦照豫省而行再歷年動用
款項甚繁難於逐條聲說臣擬於冊首開列

奏明動用字樣其下止開某項銀若干而不備叙其

事由又據署布政使謝旻亦詳臣將動用耗羨奏
請報部備案與臣所見相同合併聲明是否允協

伏候

聖裁為此謹

奏

籌思及此可謂詳慎之至造冊報部時雖云項款繁雜
難於逐條聲說亦必將所以奏准原由咨明方好不然
該部未免以違例駁議也

同日又

奏為遵

旨密奏仰祈

聖鑒事竊照社倉積穀一項數年以來臣時時勸諭各屬各屬無不凜遵成法勸諭樂輸士民無強派之事官吏無侵蝕之弊法良意美行之有年自臣總督河東并飭令東省俱照豫省之法積穀貯倉以仰副我

皇上軫念民生之

聖意而豫省又仰賴我

皇上感召

天和豐登屢慶是以勸捐之數日增穀石之數日積陳陳
相因倉庾充足經臣於每年將社倉實貯數目逐
一奏

聞在案除舊管雍正五年分共捐貯穀麥豆一十五萬
四千三百七十三石零今據布政使謝旻查據開

封等八府屬汝陳等七州并所屬彙報雍正六年
分新收捐穀一萬九千三百四十七石零豆一百
一十四石零蕎麥九十一石零芡草籽一十二石
零稻穀二石五斗零息穀三千三百九十石零盈
餘穀四百七石零以上共二萬三千三百六十七
石零實在新舊二項貯倉共一十七萬七千七百
四十石零臣并檄行各屬轉飭各州縣正副社長
加謹收貯仍飭地方官不時稽查在案至雍正七

年秋收後勸捐穀石俟有成數容臣查明再行繕摺奏

聞所有雍正六年分各屬實在捐貯社倉新舊穀石理合恭摺密

奏仰祈

聖鑒謹

奏

嘉悅覽焉社倉一事料理最難妥協宜詳慎為之

同日又

奏為恭報黃河水汛平穩仰慰

聖懷事竊查豫省黃河此時正當伏汛臣於本年五月二十九日據陝西寧夏府知府鈕廷彩報稱五月十九日寧夏水長二尺有餘等因到臣臣即移咨河東江南河臣并飛檄管河道河北道督率官弁兵夫等無分風雨晝夜嚴加守護巡防臣復另委千把員弁不時來往嚴加稽查隨據管河道祝兆

鵬河壯道朱藻陸續具報於六月初二日黃河水
長二尺當即消落一尺初四日沁河水長二尺初
六日黃河水長三尺初七日黃河水落一尺四寸
初九日黃河水落二尺沁河水落一尺十一日黃
河水長二尺九寸十三日水落一尺五寸河岸高
出水面三四尺不等並未出槽堤埽工程俱各平
穩等語臣查向來寧夏水長最易泛漲近年中泓
刷深各處支河築行堵築河汛循軌水未出槽此

皆仰賴我

皇上敬祀百神誠通

上帝是以河流安瀾堤埽鞏固臣不勝踴躍懼忤之至所
有水勢長落河汛平穩情形理合繕摺奏

聞仰慰

聖懷謹

奏

惟加勉敬慎以仰冀

上天垂佑至霜降後方敢言一歲河工事竣也

同日又

奏為據詳代奏恭謝

天恩事竊查豫省各道荷蒙

聖恩添給養廉銀一千兩臣欽遵

諭旨當即行知各道去後嗣據糧儲道張建德南汝道

今調登萊青道孫蘭芬管河道祝兆鵬河北道朱

藻會詳呈稱竊建德等前蒙

皇恩優渥賞給養廉廩祿虛糜曠官滋懼茲復蒙
皇上俯恤道員有加無已增養廉於常數之外沛
殊恩於重祿之中

賞賚自天感激無地惟有益殫臣心益竭臣力以仰報
天恩於萬一耳為此具詳公懇代

奏前來臣查道員無

題謝之例但各道感激

天恩臣不敢壅於

上聞是以據詳繕摺代

奏伏乞

聖鑒謹

奏

覽代奏情節知道了當向伊等傳旨云古之人正其誼
不謀其利明其道不計其功若於賞賚時而始言感激
圖報則落第二義矣但盡臣節所當為何論君恩之薄
厚能束此心以往自無不蒙

上蒼照察果於冥默中獲邀

神明錫佑勝朕賞賚奚啻什伯相倍耶諭令於斯奮勉為
是

同日又

奏為欽奉

聖訓據實覆奏事竊臣齋摺家人捧回臣恭辭增給養
廉摺內奉有

硃批諭旨仰見我

皇上恩待臣工有加無已臣跪讀之下感激涕零伏念
臣豫省養廉已蒙

恩賞過厚支用裕如是以前見署撫臣岳濬咨會議加
臣之養廉臣即備陳微悃恭摺

奏辭茲伏讀

聖諭始知加臣養廉出自

天心臣何人斯而蒙

皇上體恤之深

寵遇之厚一至於此但臣支領養廉銀二萬八千九百餘兩除兩省用度外每年尚有盈餘存貯臣犬馬餘年受

恩深重不敢以

皇上之帑金恣意費用又何敢於支用富足之外再領

養廉伏乞

聖慈俯允臣已切勿強勉操持或致稍有缺乏以副朕意請庶幾臣心稍安益戴

天恩於無既矣再府州縣養廉又蒙

皇上垂念令與東省畫一臣查豫省與東省府州縣養廉多寡原相去不遠惟東省州縣於養廉之外按正銀一兩扣留耗羨一分以為公費之用此則豫省所無者今蒙

皇上推恩逮下一視同仁臣敢不仰體

聖心再加斟酌查各州縣錢糧多寡不一地方衝僻不同至於公務之繁簡則全視乎地方之衝僻而不係乎錢糧之多寡臣謹按地方繁簡分別大中小

等則

奏請酌給公費查豫省每年實徵銀三百一十四萬
五千一百五兩零以每兩一分扣算共銀三萬一
千四百五十兩零今擬直隸州七州每州給銀三
百兩大州縣四十一處每處給銀二百四十兩中
縣四十九處每處給銀二百兩小州縣十一處每
處給銀一百八十兩共銀二萬三千七百二十兩
尚餘銀七千七百三十兩臣又查得各司府首領

官及各州縣巡檢居常有薪水之需差遣有脚力之費臣今仰體

皇仁擬將前項所餘銀兩酌量分給司府首領官巡檢為養廉之需俾微末小臣均沾

聖澤查豫省司府首領官共十四員每員給銀一百兩
經管地方之巡檢共六員每員給銀八十兩二項
共銀一千八百八十兩以上公費并養廉銀共二
萬五千六百兩行令各州縣仍解司庫按季給發

所餘銀兩仍貯司庫以克公用臣欽遵

聖訓斟酌

奏請倘蒙

此議甚好照所請行
俞允即於雍正七年秋季為始是不獨各州縣公費有

資而微員末吏無不踴躍鼓舞共戴

生成於億萬世矣至東省各州縣扣留之公費銀一分

伏候奉

旨允准之後臣并咨會山東署撫臣費金吾照豫省分

別大中小之議另行均平酌給其首領巡檢等員
兩省事同一體自不應互異
亦照豫省而行是否允協統候

聖裁再臣密覆山東濱州董姓一摺伏讀

諭旨仰見

睿慮精詳無微不至臣惟有謹遵
原非急務徐徐查訪可也

聖訓時刻留心密為察訪俟果有實據容臣恭摺奏
聞為此謹

奏

覽

同日又

奏為欽奉

聖訓據實覆奏事竊臣齎摺家人捧回臣恭報豫省二
麥收成分數一摺奉有

硃批諭旨仰見我

皇上聖德高深天人一貫感應之機既默契乎

天心盈虛之理復洞徹於

睿慮臣跪讀之下頓啓愚蒙乃知

大聖人敬謹以事

天精深以察理廣大淵微非臣愚所能窺見萬一惟有欽
遵

聖訓敬誠以待以期無負

皇上指誨之至意耳為此謹


奏

朕於人事紛紜殊茫然莫究其涯涘惟於天理昭灼實

確乎見透於隱微

天人交感之機何異影之隨形響之應聲其間幾曾有毫

釐差忒耶



硃批諭旨卷一百二十六之十六

欽定四庫全書

史部

硃批諭旨卷一百二十六之十七

臣 永瑤恭校

編修_臣 裴謙覆勘

總校官中書_臣 朱 鈐

校對官中書_臣 王鍾泰

膳錄監生_臣 陸潮愈

欽定四庫全書

硃批諭旨卷一百二十六之十七

硃批田文鏡奏摺

雍正七年七月初四日河東總督臣田文鏡謹

奏為恭報黃河水汛平穩仰慰

聖懷事本年六月二十六日據陝西寧夏府知府鈕廷
彩報稱六月十四日寧夏水長二尺有餘等因到

臣臣當即移咨河東江南河臣并飛檄管河道河

北道督率官弁兵夫等無分風雨晝夜嚴加防守
臣復另委千把員弁往來稽查隨據管河道祝兆
鵬河北道朱藻陸續具報沁河於二十八日水長
二尺黃河於二十八日卯時起至二十九日寅時
水長二尺八寸並未出槽惟祥符縣程家寨水長
至六尺一寸其孫家莊卑窪處所水與民堤相並
風浪相激即漫越民堤之上當即取土加堰並未
流至大堤隨於是日辰時水即減退至三十日寅

時水俱消落一切堤埽工程俱各平穩等語臣即
飛檄管河道將孫家莊民堤有漫越之處立即加
土培高仍飭在工官弁加謹巡防相機料理毋得
疎懈所有水勢長落河汛平穩情形理合繕摺奏

聞仰慰

聖懷謹

奏

覽沁黃消退堤埽平穩等語慰念二字朕竟不能落筆

直待霜降水涸方敢釋懷耳敬之慎之

同日又

奏為欽奉

上諭分析奏明河東二麥收成分數仰祈

睿鑒事雍正七年六月二十二日接到大學士臣馬爾

賽張廷玉蔣廷錫寄字內開本年六月初六日奉

上諭向來各省督撫奏報年歲收成皆云幾分至幾分不等似此未曾分析清楚未免朦混嗣後可細加分

別一府之中如九分者居十之幾八分者居十之幾
照此類推據實奏報則朕可以詳悉收成之分數爾
等可密寄信與各省督撫知之欽此仰見我

皇上旰食宵衣疇咨民隱年穀收成動關

聖念伏查河南開封府一十四屬俱報十分收成歸德
府九屬俱報十分收成彰德府七屬報十分者十
之四報九分者十之三報八分者十之三衛輝府
八屬報八分者十之六報七分者十之四懷慶府

七屬報八分者十之六報七分者十之四河南府
十一屬報十分者十之八報九分者十之二南陽
府十二屬俱報十分收成汝寧府九屬俱報十分
收成汝州共五屬俱報九分收成陳州共五屬報
十分者十之八報九分者十之二許州共五屬報
九分者十之八報八分者十之二禹州共三屬俱
報十分收成光州共五屬俱報十分收成鄭州共
五屬俱報八分收成陝州共三屬俱報九分收成

此豫省二麥收成分數之次第也再查山東冊開
濟南府一十八屬報十分者十之二報九分者十
之三報八分者十之四報七分者十之一兗州府
一十七屬報十分者十之二報九分者十之二報
八分者十之四報七分者十之二東昌府一十八
屬報九分者十之四報八分者十之六青州府一
十四屬報十分者十之一報九分者十之二報八
分者十之六報七分者十之一萊州府七屬俱報

十分收成登州府八屬俱報九分收成泰安州共
四屬俱報九分收成武定州共四屬報九分者十
之八報八分者十之二濱州共四屬報八分者十
之七報七分者十之三曹州共三屬俱報九分收
成濟寧州共四屬俱報八分收成沂州共三屬俱
報八分收成其十衛三所報八分者十之五報七
分者十之五此東省二麥收成分數之次第也臣
欽遵

諭旨謹將雍正七年分河東二麥收成分數逐一分析

奏

聞伏乞

聖鑒為此謹

奏

覽奏曷勝欣悅未料豫省麥秋如此豐稔也即東省收成亦為向所罕聞斯乃

上天眷顧我君臣而加惠於黎元至優極渥當朝夕焚香

荅謝益勵修已治人之術耳期共勉之

同日又

奏為欽奉

上諭據實奏明事雍正七年五月初一日准兵部咨為
欽奉

上諭賞給河南督標兵銀四千兩運用生息以備兵丁
吉凶之費等因到臣臣當即行令布政司移會臣
標中軍副將查議去後嗣據布政使謝旻中軍副

將王來祐會詳呈稱兵丁生息銀兩必須料理妥協委用得人方不負

朝廷惠濟兵丁之

特典請就近發給祥符縣當商十五家代運生息向來各舖贖當照例三分起息今議扣除利銀一分為當商紙筆工食之費令其長年按照二分起利繳貯祥符縣庫遇有營兵吉凶需用該營具詳報明移縣關領仍於歲底將出入之數造冊報部各商

無不情願均勻分領取有領狀連環互保具詳前來臣伏念臣標兵丁荷蒙

皇上天恩賞銀四千兩生息資用以濟吉凶之費自應仰體

聖心妥協辦理俾利源生生不息以副我

皇上優恤兵丁至意臣思此項銀兩運用不得其道有滋擾之弊委任不得其人有虧缺之虞惟當商係殷實富戶其業又屬便民官無營運之勞兵獲生

息之利臣再四斟酌似屬妥便臣是以令布政司
動支正項銀四千兩分給各店仍令祥符縣查察
各商不許借官銀名色額外取利臣并移咨山東
署撫臣布政使費金吾在案所有遵

旨賞給兵丁生息銀兩酌量料理之處理合據實

奏明謹

奏

據奏欲將此項銀兩分給當店代兵營運未嘗不是但

既恐累商又恐商人偶有事故或致兵丁弗獲實惠所
料理處朕尚不深以為然

同日又

奏為奏

聞事竊查藩臬兩司為通省錢穀刑名之總滙庶務殷
繁責任重大我

皇上特加簡拔務期承流宣化弼教明刑克稱其職以
上佐

聖治臣仰體

天心時加勉勵留心體察查河南署布政使謝旻自雍正六年七月初五日到任迄今一載實心任事正已率屬勤於督課嚴於察吏凡地方事務辦理精詳蓋該司本具明敏之才而又能銳志向上者也臣近在同域察試既確是以據實繕摺奏

聞伏乞

聖鑒謹

奏

謝旻乃出格聰明大有本領人但嫌其欠篤實耳以卿
實心辦事之督臣為其上官而又現被朕恩眷最隆伊
思己身之優劣臧否定於卿之一言若因此而暫勉一
是字與卿看則離卿獨任時必不能堅持初志毫無改
移也於斯須詳加體驗方得真情平居共事當不時勗
誠勉其弗及匡其不逮以成全之朕深重其人而不能
無疑命伊署理豫藩原令隨卿辦事知所做效也此意

曾面諭伊其再加確試具奏以聞

同日又

奏為請定交穀交馬之例以杜指折以肅交代事竊
照州縣官新舊交代凡倉庫錢糧驛馬等項自應
據實查盤秉公授受在上司不得徇庇前官抑勒
交代在後官不得指勒前任挾詐行私斯於理為
至當於法為得平臣謹就倉穀驛馬兩項為我
皇上敬陳之夫倉穀上關

國儲顆粒為重若霉爛紅朽糠粃不堪接任官當據實詳報揭叅著落前官追賠其實在存倉好穀即應照數盤收依限出結若不問穀之高下概稱掇颺已非至當之論使果從公掇颺設有不足令前官買補交倉猶曰為倉儲起見今不過借掇颺之名以刁難而其意在於私議幫貼究之穀未嘗掇亦未嘗補而銀則後官肥己臣愚以為存此掇颺之名以滋弊端不若核定得米之數以清交代伏

查稻穀粒大而殼厚每穀一石碾米五斗即屬好穀粟穀粒細而殼薄新穀一石碾米有至六斗餘者其倉穀存貯日久碾米糠粃較多至五斗六七升者即屬好穀臣請以倉穀每石碾米五斗七升為率嗣後河東兩省交代倉穀先驗穀色如非霉爛紅朽即於各倉抽取碾米試驗如穀一石碾米果有五斗七升即行盤收如不足五斗七升按所少之數計算詳明上司著落前官買補無許私折

若接任官借端勒捐從重叅處其或碾米不足定數彼此私議折價前後官一併叅革究擬如此庶接任官不敢存私捐勒交代易清而穀石核米交盤無所假借似於倉儲亦有裨益也至於驛馬定例州縣交代委員督同新舊官從公查驗分別退收如有瘦老殘疾不堪應差者自應退還前官著落賠補其非殘疾老病瘦損實堪應差之馬當從公驗收斯為慎重驛遞若任意去取使監收之員

不敢叅酌可否而將實堪應差之馬挑回不收勒
令前官每匹交銀十二三兩猶稱不敷及交明馬
價又言驛馬應差甚急交價一時難買而以四五
兩一匹賤買其原馬以應差而將餘銀入己不但
挾詐交接殊欠公當而於驛遞亦恐漸滋弊竇臣
請嗣後交代驛馬若後官挾私刁捐將實堪應差
之馬故意不收希圖折價肥己仍賤買其原馬聽
前官同監收官詳報該管上司另委公正之員確

加查驗如詐指是實將後官嚴叅照溺職例革職
倘監收官偏袒捏詳亦一併叅處其或馬匹果有
老病缺額應補而前官或係病故或因別案叅革
審擬呼應不靈無人可託不能買馬補交者應以
十二兩為定價交與後官買馬應差仍詳該管上
司委員查明取結庶驛馬無私折之弊而交代亦
得其平矣臣為肅清交代起見謬陳末議是否有
當伏候

聖裁為此謹

奏

舉凡類斯新舊兩相授受之事斷難一以法齊要在居上位者調劑適中耳近日以來直省交代捐勒之弊不時上聞然雖知其弊亦竟無可如何指不承接固屬刁難勒令收受抑豈公平全賴卿等督撫大吏於未交代前推誠訓誡正交代時留心察訪已交代後揆情酌理務俾不致於偏即此可以驗知該員之居心立行也朕

謂前任如果事事清白後任豈皆人人苛刻今接受之
干係既重又不令暢意查盤而責成其將來不致虧缺
則無米之炊何從施巧殊非公論至於碾米驗穀一說
似乎有理然各厰米色畫一者少碾驗之舉聽舊任為
政耶將新任是從耶如新任是從惟檢下色付之確磴
則舊任之賠累更不可數計矣若云仗委員秉公監收
秉公之員豈可多得乎偏袒之議安保其無又驛馬一
項其弊更難悉數於中聊摘一二端另行批諭總之交

代案件無有定法可恃惟在隨時隨事合宜辦理庶得公平候朕發訓旨一道通頒直省首申詐指之戒兼遏苛刻之風或於卿等膺統轄重寄者不無少助云爾

同日又

奏為奏明事雍正六年七月十五日准戶部咨為山西濫支耗羨一案經晉省撫臣覺羅石麟具題應著落前任巡撫及前任布政司各名下分賠內開臣前署山西布政司任內應賠交代部費等項銀

共該賠銀六千二百四十二兩零以文到一年內
將應賠銀兩照數完解晉省等因到臣臣思前項
銀兩雖准部咨行令解交晉省還項但臣查雍正
六年六月內奉有

諭旨各省藩庫均屬國家公帑原無區別嗣後有行旗
行籍追補之項該員交納之時即於本省布政司衙
門交納布政司收明貯庫欽此欽遵在案是此項賠
補銀兩似可比例就近解交豫省藩庫以省運送

之煩臣蒙

皇上天恩每年賞給養廉銀兩用度有餘今將前項應
賠銀六千二百四十二兩零於雍正七年六月二
十七日照數扣存藩庫收貯除咨明戶部及山西
巡撫衙門外所有微臣賠補山西布政司任內銀
兩及就近扣交藩庫緣由理合

奏明為此謹

奏

自應就近扣交豫省藩庫為是所奏知道了

同日又

奏為奏請動用公項銀兩修理瀆廟仰祈

睿鑒事竊惟江淮河濟是稱四瀆歷有廟祀載在祀典
查南陽府屬桐柏縣為淮水發源之地向來建有

廟宇以祀

淮瀆之神伏過我

皇上御極以來敬

天祀神於雍正元年十二月二十三日奉有

恩詔凡嶽鎮四瀆廟宇傾頽者該地方奏明修葺欽此
彼時桐栢神廟現屬完固是以未經議修茲據署
布政使謝旻詳稱桐栢縣

瀆神廟所有大殿捲棚東西兩廊鐘鼓二樓大門戟
門

御香亭等處日來漸次塌卸據南陽府詳據桐栢縣將
工料數目確估實需銀一千八十三兩零委無浮

冒等情詳請修理前來臣伏念

瀆神保障淮流有功運道民生今廟宇塌卸自應修理臣當即委員查明確估一應工料實在需銀一千八十三兩零可否仰請

聖恩在雍正七年分公項銀內照數動支給領委員監修擇日興工庶幾

廟貌巍巍享祀不忒以彰

聖朝崇德報功之大典伏候

聖裁臣未敢擅便謹繕摺

奏明仰祈

睿鑒謹

奏

淮瀆正神廟宇傾頽理應修葺但既奏請興工當期煥然一新所估為數尚少卿酌量籌計再加增益可也

雍正七年七月二十一日河東總督臣田文鏡謹
奏為恭報河東兩省得雨日期仰祈

睿鑒事竊查雍正七年七月初四日經臣將豫省七月初四日以前并東省六月二十四日以前兩省得雨日期分寸具摺恭

奏茲據豫省閩屬具報七月初五初七初八十四十七等日各得雨入土二三四寸不等又據東省閩屬具報七月初一初四初八初九等日各得雨二三四寸不等臣查六七兩月雷雨時行誠如

聖諭夏末秋初雨水過多絲毫不爽益信我

皇上默契

天心見透隱微實非臣愚所能仰窺萬一但目下雨水雖
多於田禾並無干礙查秋禾早者漸次成熟晚者
穗皆齊吐所有河東兩省得雨日期并秋禾情形
理合恭摺奏

聞為此謹

奏

覽河東雨澤優渥秋禾成熟情形朕懷為之深慰

同日又

奏為恭報黃河伏汛平穩仰慰

聖懷事本年七月初七日據陝西寧夏府知府鈕廷彩報稱六月二十八日寧夏水長二尺有餘等因到

臣臣當即移咨河東江南河臣并飛檄管河道河北道督率官弁兵夫等嚴加防守臣仍飭委千把總往來巡察嗣據管河道祝兆鵬河北道朱藻并各廳汛員弁具報七月初八日黃河水長三尺沁

河水長二尺二寸隨於初九初十十一等日水俱
消落歸槽又於十七十八兩日黃河水長三尺一
寸沁河水長四尺六寸隨於十八十九兩日水各
消落三尺一切堤埽工程俱各平穩等語臣竊查
伏汛以來黃沁二水雖長落靡常今伏汛已逾堤
工鞏固此皆仰賴我

皇上慎重河防至誠至敬屢頒

訓旨指示周詳是以在工官弁無不敬謹防護始獲此

安瀾之慶也所有伏汛平穩情形除會同總河臣

嵇曾筠另疏

題報外理合繕摺恭奏仰慰

聖懷謹

奏

轉瞬即屆秋汛督飭管河各員備加敬慎防護可也

同日又

奏為奏明事竊照豫省解陝馱馬准川陝督臣岳鍾

琪咨覆豫省所解馬三千匹俱經照數收明未曾
言及馬匹疲瘦勞傷臣正在

題報間接准部咨據大將軍岳鍾琪奏稱豫省馱馬
疲瘦勞傷者十居四五除餵養無益者即將餘馬
補換內有三廐以下馬一千二百三十三匹分給
西安各標營兵丁抵補摘調空缺為明春馱馬之
需部議以上年五月行文今年三月起解沿途又
有草料餵養何至疲瘦勞傷令臣查明具奏臣伏

讀之下不勝悚懼惶惕竊念臣蒙

皇上教養隆恩事無鉅細悉敬謹辦理不敢苟且塞責

矧我

皇上命將出師以彰

天討臣衰朽庸材未能披堅執銳效力疆場而受

國厚恩共勤

王事之血誠實寢食不忘是以此項馬匹臣奉文之後

即嚴飭加意餵養及臣因公前赴東省又復札致

檄行至再至三今春起解之時臣又嚴加挑選擇其臚健者始行起解臣實惟恐辦理未協有負我皇上委任微臣之

聖意又何敢以疲瘦勞傷之馬遠解克數也查臣標解馬一百三十四匹頭臚者十居九二臚者十居一壯鎮解馬六百四十九匹頭臚者十居九二臚者十居一南鎮解馬六百一十匹頭臚者十居八二臚者十居二旗馬一千六百七匹頭臚者十居四

二臚者十居四三臚者十居二此實臣同城守尉
副都統臣阿里袞及在城文武官弁逐匹驗明交
給委員起解者伊時臣驗旗馬臚雖少遜標鎮之
馬實皆可供馱載之用是以俱令解陝誠恐長途
跋涉或致減臚故仍令各多帶餘馬以備揀補茲
查據各解官雖稱沿途俱帶馬乾銀兩買備麩料
加意飼餵因天晴路乾馬行塵起為灰土所嗟而
又道路崎嶇到彼不免有勝緊口熱并減臚者俱

將所帶餘馬補交並無疲瘦勞傷等語但豫省馬匹既經寧遠大將軍臣岳鍾琪奏有三臆馬一千二百餘匹臣辦理未協之咎實為深重然使寧遠大將軍臣岳鍾琪將疲瘦勞傷之處咨覆於臣臣又何敢上欺

君父不早為自劾據實奏

聞茲蒙

聖恩浩蕩不即將臣治罪

俯照部議令臣查明具奏更自跼蹐無地除具本覆
奏仰請

皇上敕部將臣嚴加議處外所有豫省解馬緣由及微
臣感悚私忱謹據實繕摺恭

奏伏懇

皇上睿鑒謹

奏

卿料理一切公務盡心弗懈原可確信岳鍾琪承辦各

項軍需東公不刻朕更無疑據奏所解馬匹俱屬選擇
臆健云云等語豫陝相距程途遙遠解送官役疎忽不
慎致有疲乏以及暗中抵換之弊安保必無似此漫不
體察循省遽露悻悻之意毋乃涉於尚氣乎卿等皆公
忠體國為朕所倚任之大臣勿存毫髮彼此之念方是
密摺分辨猶或庶幾具本奏請議處殊屬畫蛇添足多
一番形迹外觀愈覺不雅矣

同日又

奏為遵

旨覆奏事竊查東省科場一切事宜現係布政使費金
吾照例辦理但科場舊例巡撫為監臨布政為正
提調今署撫臣岳濬尚未回任則監臨係費金吾
之責而正提調一官場中尤關緊要如分撥內簾
外簾派定各所員役并點名編號印卷發卷以及
點驗水菜親送主試供應領發題紙散給舉子飯
菜等項或隨同監臨辦理或正提調親自經管費

金吾既為監臨勢難兼任提調臣前覆奏費金吾署理撫印摺內蒙

皇上硃批諭旨臨期斟酌奏聞欽此今場期將屆臣欽遵

聖諭再四斟酌查山東各司道除照例按察使公元為正監試鹽法道唐綏祖為副監試濟東道張體仁為副提調外其兗寧道有河工之責登萊青道現委查勘道路俱不便入場料理惟糧道顧贊其辦

漕事務尚在場後且係進士出身應令顧贇為正
提調辦理聞內事宜但事關掄才大典理應署撫

臣費金吾

題明請

旨臣一面繕摺奏

聞一面札致費金吾令其具

題伏候

聖裁緣係奉

旨命臣臨期斟酌具奏事理相應恭摺奏

聞謹

奏

近經有旨不令兩司入關辦理場務其仰遵定例另行
籌酌人員具奏以聞

同日又

奏為司庫存貯零星歸公銀兩據實奏明仰祈

聖鑒事竊查豫省司庫向有零星歸公一項蓋因無項

可歸卽另貯司庫以克公用自康熙五十年起至
雍正六年歲底共歸公銀二千五十三兩零歷年
除布政司詳明動用敬刊

聖祖仁皇帝聖諭

廣訓并每年欽奉

上諭及修補學宮樂器置備籩豆延請教師演習樂舞
生一切聘儀供應盤費等項共動用銀五百二十
兩零現存司庫銀一千五百三十二兩零臣伏思

此項銀兩自應充作公用遇有似前項公事每年
祈晴禱雨敬

神酬

神因公差遣員役量給盤費及現今修理錢局等項
均係地方公務既有此項零星銀兩可以動用不
必再動公項實為妥便臣前此雖因歲無常額額
無常數動用零星不敢瑣瑣煩瀆

聖聰但臣伏思歸公銀兩既存司庫即屬

國帑自應據實

奏明仰請

皇上將此項存為地方些小公事之用嗣後如有此等
歸公銀兩亦令存貯司庫遇有動用布政司詳明
俟臣批准支給於每年歲底開造四柱清冊送臣
衙門備案謹將歷年歸公款項及現存銀兩細數
逐條開列另具清單恭呈

御覽謹

奏

足見慎重公項出納絲毫不苟知道了所請可行

同日又

奏為據實奏明仰祈

聖裁事本年五月十六日據登州鎮總兵官臣萬際瑞

呈稱車騎兵丁欽奉

皇恩賞給安家銀二十兩又製備行裝銀六兩誠恐各
兵任情花銷故令各該營將備代為製備安束營

都司鮑士錦將一應軍需毫不經目自火藥鉛子器械以及衣帽行李一無周備以五十五人行李僅雇小車六輛沉重難行日行五十里等因請叅前來臣思

恩賞各兵安家銀兩應給各兵用度其應備行裝等項臣於奉文之時即為酌定開單令各兵自備俟辦完照單點驗蓋因所用油單衣帽等項如各兵向有製備者即可省此銀兩聽其他用今該都司是

否將銀兩侵蝕以致行裝不全未據聲明至車兵
進京馱載行李東省原議每兵十名給騾二頭按
站給與脚價今雇車六輛是否該都司將脚價侵
蝕抑係各兵朋雇亦未聲明臣不敢草率入

告隨照會該鎮確查間又據山東布政使費金吾札開
安東營都司鮑士錦代為車兵製備行裝暗中賠
補百餘金有車兵李蘭等七人素常刁悍疑該都
司有扣剋之意四處揚言業囑安東營叅將賀陞

將刁兵懲治各兵已自省起程進京等語臣又密訪無異茲又據登鎮總兵官萬際瑞呈稱兵丁製辦行裝酌定開單令各營備辦造冊送閱今據安東營冊開軍裝俱各齊全及至青州府點驗十無一二再查各營行李或係雇覓騾頭或係馬車馱載惟該營所雇小車僅日行五十里查該營距京程途幾及二千里計日必得四十天方可到京已出五月二十五日之限矣該都司於軍裝事宜並

不留心雖無侵蝕之弊難免貌玩廢弛之咎等情
復另揭請叅前來臣查都司鮑士錦雖據鎮臣萬
際瑞揭其貌玩軍需辦理未協但該都司並無侵
蝕之弊而且墊用銀兩似非不留心辦理者至馱
載行李雖部文令雇覓騾驢然地有衝僻不同或
本處無脚騾可雇則暫用小車以代俟到省另雇
亦屬一時權宜並非貪贓壞法確有劣蹟難容者
可比況據布政使費金吾言係刁兵李蘭等七人

造言興謗又未便因此而即叅都司以長刁風但
既據鎮臣萬際瑞揭報到臣相應據實備悉奏請

皇上天恩可否免其叅處

洪恩出自

聖裁臣不揣冒昧恭摺奏

聞伏乞

睿鑒謹

奏

覽奏都司鮑士錦並無侵蝕之弊辦理未協猶可原恕
應免其叅劾將曾經奏聞并所降諭旨咨明萬際瑞令
其知之

同日又

奏為據實奏明仰祈

聖裁事竊照山東東平州民牛三花拉即牛見德在青
萊二府屬諸城等州縣地方倡為三元會空字教
名色誘哄愚民一案前經拏獲案犯徐秀等而牛

三花拉逃走未獲經臣於雍正六年九月內將緣
由恭摺奏

聞并密行河東兩省嚴加訪拏在案迄今將及一載臣
屢飭懸賞勒緝無如該犯潛遁無踪尚未就擒茲
據兩司將現犯五十餘人審錄供情詳報前來臣
查左道惑衆有闕風教自宜執法嚴究但今牛三
花拉懼罪潛遁其現獲隨教之犯嚴審並無他術
實皆鄉愚無知始而聽其誘哄妄冀獲福療疾起

度祖宗繼而見有存積香錢又希分利合夥貿易
事發之日又恐被獲治罪或輾轉藏匿引送此乃
伊等之實情實事可否將隨教合夥貿易之賈得
志高擇善李大本厲明成及聽從轉誘圖利之張
太元張坤石容留轉送之徐秀丘志柱張顯各枷
號三箇月滿日重責四十板知情藏匿賈得志吳
氏之譚標劉文炯隨教而為吳氏說媒之李九興
各枷號兩箇月滿日重責四十板隨教而款待吳

氏之范存信事未發而容留牛三花拉家屬之丘彬各枷號一箇月滿日重責四十板但被誘隨教而未與貿易之朱相卿楊文各重責四十板其雖未隨教而知情不首之徐明等及不察來歷留住之倪常才莊存敬各重責三十板其餘不知情之周二等及未隨教而聽從雇主尊長指使轉送之張三等并脚夫孟孺各予免議和同被誘之孫氏張氏照例枷責并孫氏之義女小兒姐及被謀娶

之吳氏均給親屬領回如蒙

聖恩俞允將各犯發落後交給鄉地隣族保領嚴加收
管各務本業不許再與外人來往如或再犯加倍
從重治罪在逃牛三花拉等臣飭令各屬務必緝
獲究治再此案倘荷

皇上恩照臣請從寬完結其從前失察各官去任而為
別案被劾者居多臣仰懇

皇上天恩概免叅處可否如此結案伏乞

聖裁為此謹

奏

所奏是一面嚴緝正犯務獲究擬示懲一面將脅從各犯及不知情人等先行發落以清積案其從前失察各官姑照請免其叅罰

同日又

奏為欽奉

上諭事雍正七年七月初四日准刑部咨內開雍正七

年六月初六日欽奉

上諭游惰之民自昔治天下者之所深惡若好為賭博之人又不止於游惰而已荒棄本業蕩廢家資品行日即於卑污心術日趨於貪詐父習之則無以訓其子主習之則無以制其奴鬪毆由此而生爭訟由此而起盜賊由此而多匪類由此而聚其為人心風俗之害誠不可以悉數也大凡為不善之事者雖干犯功令猶可得微利而獨至賭博今日之所得明日即

未必能保若合一年數月而計之勝者與負者同歸於盡此天下之人所共知者而無如邪僻之人一入其中即迷而不悟且甘為下賤而不辭亦大可悲矣數年以來屢次降旨嚴禁而此風尚未止息者則以製造賭具之尚有其人而有司之禁約未嘗盡力也百工技藝之事可以獲利營生者何事不可為而乃違條犯法製此壞風俗人心之具其罪尚可言乎凡地方大吏有司均有化民成俗之責而乃悠悠忽忽

視為泛常安辭溺職之咎今特定本地官員勸懲之法以清其源嗣後拏獲賭博必窮究賭具之所由來其製造賭具之家果審明確有證據出於某縣將該縣知縣照溺職例革職知府革職留任督撫司道等官各降一級留任如本地有私造賭具之家而該縣能緝拏懲治者知縣著加二級知府加一級督撫司道等官紀錄二次將此勸懲之法永著為例於雍正庚戌年為始著該督撫通行曉諭使城邑鄉村及遐

陬僻壤咸使聞之特諭欽此欽遵移咨到臣仰見我皇上覺世牖民端本澄源勸懲兼施立法盡善臣惟當
欽遵

諭旨督率司道府州縣力行察禁使賭風頓息賭具盡
銷以仰副

聖主懲戒游惰洗除積習之至意尚何芻蕘之足陳焉
但臣愚以為造賣賭具斷不能瞞地甲牌隣之耳
目必使地甲牌隣不肯為其容隱而又加以地方

官之嚴察則造賭具者自無矣查雍正四年十二月定例造賣賭具之地方保甲知情不首杖一百等語臣請嗣後拏獲製造賭具之人除本犯照例分別首從問擬軍流外其不首報之地方甲長牌頭隣佑於杖一百之外再枷號兩箇月如係受賄通同隱匿加倍治罪其能將製造之人報官拏獲審實地方官捐賞銀三十兩倘有畏其勢惡恐被挾讎報復不敢明首許令據實密稟免其給賞如

此則地甲牌隣既利重賞又懼法懲即不敢通同
徇隱似於禁造賭具不無小補也此臣管窺之見
是否可採未敢具本謹繕摺

奏請伏乞

睿裁為此謹

奏

禁造賭具一節嚴繩鄰保不使容隱所見固屬有理然
朕謂有治人而無治法果地方官盡力察禁不稍寬縱

復申之以賞勸自漸止息若又倍加懲治恐更增弊何也老氏有言法令滋彰盜賊多有蓋刑憲太峻畏懼之情彌甚而詭避之術更巧或從而競相掩覆以希幸免則反無益矣

雍正七年閏七月初十日河東總督臣田文鏡謹奏為恭報河東兩省得雨日期仰祈

睿鑒事竊查雍正七年七月二十一日經臣將河東兩省得雨日期分寸具摺恭

奏茲據豫省闔屬具報於閏七月初五日酉時起至
初六日午時止各得透雨入土七八寸不等隨即
晴霽目下既可及時收曬而大雨之後在地之晚
穀晚豆棉花蕎麥等項更加茂實且乘此土膏滋
潤農人即可耕犁種麥百姓無不懽呼載道感頌
皇仁以為風調雨順實從來所未有也又據東省闔屬
具報七月十四十八二十四二十八等日各得雨
入土四五寸不等俱各霑足所有河東兩省得雨

日期理合繕摺恭

奏仰慰

聖懷謹

奏

今歲直隸地方雨暘亦甚屬均調但意中惟恐秋霖不止河工可慮耳

同日又

奏為恭報豫省秋禾收成分數仰祈

睿鑒事竊照豫省今歲秋禾長茂結實情形經臣節次
奏

聞茲據開封等八府屬汝陳等七州并所屬報稱高粱
黍穀芝麻黃黑菜豆等項悉行收穫登場又值天
氣連日晴霽不論平原沃壤及沙土山隴地畝俱
各穗長實大收成豐盛即現在地內之晚豆棉花
蕎麥亦極茂實異常轉盼即可收穫并將收成分
數逐一具報前來臣復躬率在城文武各員親詣

四郊驗看遍問老農俱云今歲秋禾十分收成實
為從來所未有等語臣不勝踴躍歡忭惟有欽遵
聖訓朝夕焚香咨謝

上天愈加敬畏黽勉焉耳其各屬收成分數遵

旨敬謹分析另摺恭呈

御覽伏乞

聖鑒謹

奏

今歲農事如是豐穰固屬可慶不待言矣我君臣又當加勉若何修省以為來歲感格

上天慈佑

聖祖垂庇之道朝夕乾惕曷容少間

同日又

奏為恭報黃河水汛平穩仰祈

睿鑒事竊查黃河水汛平穩業經臣節次具摺恭

奏茲於雍正七年閏七月初四日據陝西寧夏知府

鈕廷彩報稱本年七月二十三日寧夏水長一尺有餘等因到臣當即移咨河東江南河臣并飛檄管河道河北道督率官弁兵夫等嚴加防守臣仍飭委千把總員往來巡察嗣據管河道河北道并各廳汛員弁等具報閏七月初六日黃河水長一尺初七日黃河水長二尺五寸沁河水長二尺四寸隨於初八日黃沁二水俱消落歸槽一切堤埽工程俱各平穩所有水長水落堤埽平穩情形

理合繕摺恭

奏仰慰

聖懷謹

奏

覽黃沁消退情形深慰朕念仍當嚴飭該管官各盡乃職敬謹從事待八月後方可言今歲工程平穩也

同日又

奏為奏

聞事雍正七年七月二十五日據山東登州府寧海州
報稱本州萊山集地方於雍正七年六月二十九
日大雨普降山水驟發因僻處山野趨避不及被
溺男婦六口幼孩四口共十口水即消退田禾並
無損壞等情詳報前來臣即飛檄山東布政司委
員查勘被溺情形有無傷損田禾併將被水各戶
加意撫恤在案查近山地方雨後水發常有之事
茲因偶被淹溺人口不敢不據實恭摺奏

聞為此謹

奏

寧海州被水情形據費金吾亦已奏聞今歲直省皆不免有類此小災惟陝豫二省未聞耳

同日又

奏為遵

旨覆奏事雍正六年十二月初五日據河壯鎮總兵官

臣閃文繡咨呈內開雍正六年十一月初二日在

養心殿面奏云臣在漕標徐州營副將任內催漕經過山東見沿路皆有墩臺營房惟中間臺莊營汛地自黃林莊起至吳家橋沙溝營汛地自吳家橋起至劉昌莊約有一百四五十里並無墩臺營房此係漕運大路似應一體添設墩汛等因奉

旨將爾所奏交與總督田文鏡酌行欽此等情到臣臣當即檄行山東布政司作速查議去後茲據布政使費金吾詳據兗州府申稱滕嶧二縣查明沿河

一帶營房墩臺已於雍正五年正月內經前撫院
塞楞額會同巡察奚德慎具本

奏請委員查勘添建自劉昌莊起至吳家橋共建墩
臺二座自吳家橋起至黃林莊共建墩臺六座俱
各有營房三間防兵五名戍守查閃總鎮係在徐
州副將任內催漕經過山東其時尚未添建墩臺
後於雍正五年已經添設似毋庸再行添設等情
詳覆前來臣查山東沿河一帶墩臺原於雍正

五年正月內經前撫塞楞額巡察奚德慎

奏明添建墩臺八座在案似毋庸再行添建糜費錢糧也除咨覆山東巡撫衙門并照會克鎮外緣係奉

旨交臣事理相應將沿河一帶毋庸添建墩臺營房之處繕摺覆

奏伏乞

睿鑒謹

奏

據奏從前添建墩臺之處即係閃文繡所指地方果若此自不應重複增添也

同日又

奏為奏請改造倉廩以重積貯事竊查倉廩為積貯第一要務而草房非可經久臣查河南通省各倉惟常平倉內舊有草房四百五十間彼時因尚可積貯未經議改但歷年既久漸次朽爛一遇風雨

不無滲漏之處且牆壁俱係土坯壘成易致塌卸
必得一律改造瓦房另築磚牆方為堅固經久之
計茲據署布政使謝旻詳稱每間足貯五百石照
往例估用工料銀十五兩改造瓦房四百五十間
共需銀六千七百五十兩請於河北捐納公費銀
內動支等因具詳前來臣查河北事例所收公費
銀兩原係

奏明解貯司庫造冊換照公項之用又經臣於雍正

六年三月內

奏請添建倉廩即將此項動支給發蒙

皇上俞允在案今仍請於此項捐穀公費銀內動支改造似可毋庸動用正項錢糧倘蒙

恩允臣即檄行布政司動支河北捐納公費項下給發飭令改造足貯五百石委員勘驗務期高敞堅固如式仍造冊報部備案所有豫省改造倉廩動用銀兩數目理合恭摺請

旨伏乞

聖鑒謹

奏

改造倉廩極屬應行之舉但每間止估工料銀十五兩
為數太少恐不敷用既議興修當令堅固若草率了事
仍未能抵禦風雨非經久計也凡類斯裨益積貯政務
切不可惜費卿其誌之

同日又

奏為欽奉

聖訓據實覆奏事雍正七年七月二十五日臣齋摺家
人捧回臣奏署布政使謝旻摺內欽奉

皇上硃批謝旻乃出格聰明大有本領人但嫌其欠篤
實耳以卿實心辦事之督臣為其上官而又現被朕
恩眷最隆伊思己身之優劣臧否定於卿之一言若
因此而暫勉一是字與卿看則離卿獨任時必不能
堅持初志毫無改移也於斯須詳加體驗方得真情

平居共事當不時勗誠勉其弗及匡其不逮以成全之朕深重其人而不能無疑命伊署理豫藩原令隨卿辦事知所做效也此意曾面諭伊其再加確試具奏以聞欽此臣伏讀

聖諭明同日月德懋生成照鑒至微造就至切今謝旻又蒙

皇上補授太常寺卿仍署理河南布政司事則謝旻感激

天恩自必益加黽勉臣亦當欽遵

諭旨時加教導確試如果立志堅定臣再據實奏

聞為此謹

奏

今命往江西署理廵撫印務可竭力訓勉之

雍正七年八月初三日河東總督臣田文鏡謹

奏為恭報東省秋禾收成分數并河東兩省得雨日

期仰祈

睿鑒事竊查豫省秋禾收成分數業經臣具摺恭

奏茲據東省濟南等六府屬泰安等六州并所屬及
各衛所報稱高粱穀黍芝麻黃黑萊豆棉花等項
悉行收穫登場不論平原沃壤及沙土山隴地畝
俱各穗長實大收成豐盛即有前經被水被雹之
魚臺安邱寧海等州縣俱於秋禾無損是以白叟
黃童歡呼載道感頌

皇仁并將收成分數逐一具報前來臣復詢之東省往

來官弁兵役僉云今歲收成實倍勝於往年臣謹
遵

旨將收成分數逐一分析另摺恭呈

御覽臣再查豫省於本年閏七月十三十四二十二
十七及八月初一初二初三等日據闔屬具報各
得透雨入土五六寸不等又據東省闔屬具報於
本年閏七月初四初五十四十六等日各得雨五
六寸不等俱入土霑足不獨在地之晚豆蕎麥等

項更加茂實且農人乘此土膏滋潤處處可以耕
犁種麥實為風調雨順從來未有所有東省秋禾
收成分數及河東兩省得雨日期理合繕摺恭

奏仰慰

聖懷為此謹

奏

山左秋禾收成分數并兩省風雨調順情形欣悅覽之

同日又

奏為恭報黃河水汛平穩仰祈

睿鑒事雍正七年閏七月十五日據陝西寧夏府知府
鈕廷彩報稱本年閏七月初四日寧夏水長二尺
有餘到臣臣即移咨河東江南河臣并飛檄管河
道河北道督率官弁兵夫等嚴加防守臣仍飭委
千把員弁往來巡查嗣據管河道祝兆鵬河北道
朱藻并各廳汛員弁等具報閏七月十七十八二
十三等日黃河水長二尺二寸隨即消落歸槽其

沁河水並無長落一切堤埽工程俱各平穩臣查
每年秋汛自白露以後水勢漸緩今閏七月十六
日白露已過此番水汛緩弱漸長漸消臣仍嚴飭
在工官弁加意巡防毋得疎懈所有黃河水汛平
穩及水長水落情形理合繕摺恭

奏仰慰

聖懷謹

奏

朕憂慮之懷隨時漸減而敬畏之念逐歲彌增治河之道與修身理同若因微有所進而自足已無可虞而稍怠則將前功盡棄矣要當慎之愈慎也將此諭亦令嵇曾筠知之

同日又

奏為據實奏明仰祈

睿鑒事竊照東省民間之雜派猶繁錢糧之虧欠未楚

臣蒙

皇上委任至隆必須嚴覈力除以期風清弊肅臣查東省積年錢糧欠至三百萬有餘其中役蝕者多於官侵經臣嚴檄司道府直隸州嚴行糾察徹底清查除虧空在官者一經查明立即

題叅外其有衙役侵收捏欠朦混者雖本官不能辭失察之咎較諸自行侵那者有間現據各州縣紛紛察出詳報臣已一面批飭嚴行究追勒限完報但思目下當清查錢糧之際正欲各員自為覺察

若即將詳報州縣以從前失察

題叅恐別員畏懼處分反為蠹役徇庇不實力察報

臣是以暫緩

題叅若收役所侵錢糧本官能勒限嚴追設法完解

毋論本犯或本官將銀兩照數全完者臣仰懇

聖恩寬其從前失察之咎其本犯仍照律治罪若遲延

不完將失察之員

題叅著落賠補庶各員自顧考成稽查嚴而追補不

敢不力矣又流抵一項其初州縣皆借公事詳明該管上司俟俸工復給之年抵補官官相交有名無實經前撫臣陳世倌奏請將通省耗羨彌補而弊竇自此叢生或以少作多或將無作有捏造案卷通同冒銷茲因流抵各案經前撫臣塞楞額奏明仍著落各員名下追還分咨旗籍任所查追水落石出據原任歷城縣知縣劉元琦等各具呈稱冤懇求查究捏造之弊免其冤賠等情到臣臣俱

批布政使費金吾確查并飭徹底通查除原係該員在任假借公事詳准流抵者仍應向該員名下追賠若係院司各官通同捏造者應著落捏造各官名下追賠庶於法為平允且以為辜負

國恩欺罔

可謂情法兼備是當妥協之至應如此料理者君父者戒統俟查明另行具奏請

旨遵行又東省漕糧之弊甚多凡經管漕糧各衙門官役以及軍旗丁弁無一不有規禮無一不有需費

所以州縣官重耗濫徵名雖加二耗米其實則加
二五有餘也茲據糧儲道顧贄詳稱遵將糧道糧
廳官役陋規浮費及交軍時黃旗祭旗祭江折席
演戲穩跳回籌軍筓民筓軍檔民檔喜禮并運官
運弁下程酒席鑰匙通關催兌開厰撥帖呈樣撕
斛等項陋規盡行革除惟旗丁領運漕糧雇募舵
工水手均須工價食米并買備席片等費恐額設
銀米不敷經前道湯豫誠酌定通糧每石貼銀三

分食米二升藟糧途遠費繁每石貼銀五分食米
三升在案其運弁隨幫俸薪無幾亦經前道酌定
每兌米一石量給運官盤費五釐隨幫盤費一釐
均在州縣所徵耗米內支給請照加一徵收前來
臣查旗丁幫費食米及運官隨幫盤費應照前道
湯豫誠所議支給俾各辦公裕如以示體恤惟別
項漕糧陋規俱已革除則州縣已無浮費自應將
耗米核減以寬民力糧道顧贄所議加一耗米雖

約計足敷幫貼之需但恐額編腳價不敷雇車之用致啓不肖州縣借端派累里下之弊臣請每石減去耗米五升照加一五徵收即以此五升耗米留為州縣幫補雇車之用不許借名私派倘有多收斛面及指車派費嚴叅治罪此加一五耗米以雍正七年為始百姓既蒙減耗之

恩州縣又無拮据之虞官民均沐損益適中官民兩賴所論甚愜朕意皇上浩蕩之仁也又耗羨一項東省各州縣從前每有

徵多報少之弊所以耗額較之從前大率有減而無增也查豫省州縣自一錢一分起至一錢二三四五六七分不等其一錢七分者不及十處而東省州縣衛所每兩槩加耗銀一錢八分詳查其故始初亦多寡不一有一錢二三分至二錢以上者因雍正二年提解耗羨之時有彌補虧空流抵之議而帶徵康熙五十八九六十等三年舊糧全未解耗帶徵康熙六十一年雍正元年錢糧火耗又

止解司七分其餘俱係州縣扣留所以昔年火耗
本少者亦以一錢八分為率以肥私橐臣思各官
既有養廉又有公費解費其帶徵雍正元年以前
舊糧耗羨既收一錢八分如何康熙五十八九六
十等年不解耗羨帶徵康熙六十一年雍正元年
如何止解七分殊屬未協臣是以自雍正七年為
始飭令各州縣照現年錢糧之例將帶徵各年舊
糧除應扣解費公費外其餘一錢四分悉解司庫
是

充公在案臣伏見我

皇上保民若赤凡有可以紓民力而阜民財者無不

特沛曠典臣不揣冒昧因奏減東省漕糧耗米併奏請

皇上天恩將錢糧耗羨酌減二分槩照一錢六分徵收

耗羨二字

如蒙

非朕可諭之事卿職司統轄專決行之夫誰

曰不然況卿之是即朕之是卿之非即朕之非其間有

恩允即懇

何分別所見小矣朕斷不存與卿等爭名之念也
皇上特別頒上諭以雍正庚戌年為始則東省百姓既減

漕米之耗又減錢糧之耗羣戴

高厚於億萬斯年矣臣諸事敬慎謹密久在
始事固當如是若業既奏聞又當一論亦何必密耶
聖明洞鑒凡密奏之事不敢稍露一字總之臣受

恩深重無可圖報凡有一得之愚即據實陳

奏是否有當統乞

聖裁謹

奏

覽

諭河東總督田文鏡知悉朕於即位之二年冬間念及

州縣各官比皆初任諸多未諳或偶因才力心思一時不到致被叅黜人材殊屬可惜特命朱軾沈近思二人追憶向日已所閱歷如塾師訓蒙一般指示莅事臨民法則綴緝成書以為新進楷模續因朱軾丁憂而又久病且筆下亦甚艱澁沈近思復經物故所以蹉跎至今未就昨李衛來京陛見言及此事伊奏稱曾有訓誡屬員一冊隨進呈朕覽披閱之下尚覺不甚愜意況亦非開導初任語句卿歷外任多年甚諳練吏治可於政務

之暇悉心著作一部差人齎進朕彙集各處所擬於中
採擇裁定然後降旨刊布大抵不過如何交盤如何催
科如何驗傷如何靖盜以及查詰吏胥姦欺等類耳浙
督李衛訓誡屬員冊併發

同日又

奏為欽奉

上諭事雍正七年閏七月二十九日臣齎摺家人捧回
皇上硃筆諭旨一道及督臣李衛訓誡屬員一冊到臣

臣謹跪讀

諭旨仰見我

皇上慎重牧令愛惜人才本作君作師之

聖念垂是則是敝之成書以啓愚蒙以資吏治法至善
而意至厚也茲蒙

皇上不以臣愚

命臣著作以備採擇伏念臣自撫豫及總督河東以來

時時仰遵

聖訓凡誠飭屬員開導初任事皆有案但恐識見淺陋
詞多未達未必有當

天心臣現在細加查核詳加斟酌俟纂輯成篇進呈
御覽所有奉到

諭旨及督臣李衛訓誠屬員冊容臣纂輯完日一併恭
繳謹先繕摺覆

奏為此謹

奏

無須過勞心神非急務也於辦事餘暇從容撰就齋呈
朕覽

同日又

奏為奏請酌通河東兩省書吏換班之期仰祈

睿鑒事竊查廣東道試監察御史高山條奏各省督撫

臬司書吏親戚子弟借供應名色潛住省城名曰

外班又有兩人先後投充交相更換迭為外班由

是內外一氣暗通關節招搖撞騙其中傳達字跡

要皆不出厨役水火夫之手應將外班盡行驅逐
其所用厨子火夫一併封鎖署內不得聽其出入
書吏兩三四月換班為期太近撞騙易施似應飭
令一年一換藩司衙門一體封鎖等因欽奉

諭旨通行在案臣思除弊必清其源用法貴因其地臣
於各衙門書役蠹弊疾之最深防之最密但地有
不同人有各別如直隸院司書吏皆有缺主缺主
在外攬事納賄而在內辦事者則係久住衙門之

書辦其水菜等項皆缺主出資辦買是外班者即
缺主之別名也其他省如有類此者誠應嚴行查
逐若夫豫省則不然臣與藩臬兩司衙門書吏皆
係身家殷實之人藉以支持門戶悉屬本身入署
辦事並無缺主該班則進署下班則歸家不在省
城停留如臣與藩司衙門書吏所需鹽菜銀兩係
蒙

皇上恩賞在耗羨內支給其臬司衙門係各書吏自備

而為其買辦者即各衙門之承舍旗牌並無書吏之親戚子弟借供應名色潛住省城亦無兩人先後投充迭相更換所謂外班者已無可革除矣中州之人性多朴魯各衙門書吏不過畧曉文義畧通書寫即尋常事件辦理猶多舛誤較之江浙直隸及在部書辦之工於作姦舞弊者實迥不相侔今若定以一年換班則伊等本屬不諳之人更加生疎之久凡此一年內

國家新定之章程內外奉行之事件皆茫然不知難保其不無貽悞且三月一換伊等到家畧為料理家務轉盼即欲上班無暇別圖今以一年為期日月既長豈能在家安坐必然另尋生理及至一年屆期又欲舍彼就此未免兩難況一涉他務心更不專而衙門之事益無頭緒大費周章矣用敢備陳情由仰懇

聖恩仍令三月換班實於辦公有益至厨役火夫原係

封鎖在內不能出入并在署內水夫係在牆外送
水不使入門均不能傳通字跡其藩司職居方伯
責任綦重關防宜嚴遵例照依臬司衙門一併封
鎖至東省書吏與豫省相同倘蒙

天恩俞允其東省書吏亦懇照舊三月換班臣蒙

皇上格外恩遇信任極深凡奉行之事惟期弊竇盡除
又於公事有益是以因地制宜

奏請

聖恩俯賜酌通伏乞

聖鑒謹

奏

該部議奏

同日又

奏為豫省黃河堤工請停加修議添堡夫仰祈

睿鑒事雍正七年七月二十一日准總河臣嵇曾筠咨

內開欽奉

上諭黃河堤岸乃運道民生所關最為緊要年來增卑
培薄幸慶安瀾獨是工程報竣例應歸汛修防而額
設河兵堡夫只能修補水浪衝激之處防備臨險搶
護之用至於堤身一年之內風雨淋漓車馬踐踏漸
致損壞者亦勢所必有而堤遠工多不能責諸寥寥
兵役也朕思堤工雖千有餘里若按丈每年加高五
寸計費不過三四萬金倘置之不議一年剝削四五
寸合十年而計之其所費之多恐有不止於加修之

數者況河流漲漫不時難以預料何若逐年增修保固為未雨綢繆之計也朕意如此其果否有益之處著南北兩河總督尹繼善嵇曾筠悉心商酌詳確定議具奏欽此仰見我

皇上軫念堤工

睿慮周至臣查豫省黃河兩岸堤工荷蒙

皇上疊發帑金指示修築是以一律高堅完固臣有兼理河道之責時時飭令管河各官敬謹料理如車

馬往來另有道路不在堤上行走不致輪蹄踐踏
損傷其雨淋殘缺水溝浪窩則令兵夫隨時修補
毋許稍緩若新修之堤其頂面兩旁尚未有草根
盤結風吹雨淋不免侵削則於霜降之後兵夫工
閒之時各就所管之工逐日擡取細土填墊豐厚
夯礮堅實日積月累由少成多帑不費而工自固
也況豫省所築堤工有逾四五年者有逾二三年
者在工人員各就土性所宜種草固堤現今草莖

叢生盤結堅固若加幫新土必須剷去堤面草根
方與舊土膠粘草根一去新土虛鬆又不如舊土
草根盤結之為堅實適河臣嵇曾筠到省臣即與
面商嵇曾筠深以臣言為然隨令管河道河北道
等各將南北堤工親加查丈據稱現在丈尺較之
原估俱屬相符是豫省堤工一律高堅並無卑矮
處所似毋庸歲加五寸概議增修也惟豫省額設
河兵一千名緣上年添造浚柳船隻即於河兵內

挑選三百四十名現在河兵止有六百六十名不
敷力作且河兵簽樁下埽往來調遣未能專守堤
岸今查豫省現在堡夫一千五十八名專以守堡
修堤為事臣擬添設堡夫三百四十名分派兩岸
力作修防以補河兵之數臣亦與河臣嵇曾筠面
商所見相同臣伏思黃河兩岸堤工關係緊要我
皇上不惜帑金為未雨綢繆之計

命河臣酌議歲加五寸原恐風雨淋漓車馬踐踏漸致

損壞額設兵役不能修補之故今豫省堤工既無
車馬踐踏損傷而雨淋殘缺又隨時修補現今一
律高堅臣擬請停加修堤工止酌議添設堡夫則
力作多人即偶有雨淋殘缺修補更易而堤工日
益鞏固

國帑不致虛糜矣此事雖非

皇上命臣查議而臣於豫省堤工既知之深而信之確
不敢不直陳於

君父之前除聽河臣嵇曾筠具

題外因此議出自臣之愚見而

上諭內未

命臣會議臣不便列銜是以繕摺恭

奏伏候

聖裁為此謹

奏

詳覽所議因事制宜足見竭慮奉公俟河臣嵇曾筠具

題到日有旨

同日又

奏為欽奉

聖訓據實覆奏事雍正七年閏七月二十九日臣齋摺
家人回豫捧到

皇上硃批諭旨臣敬啟跪讀於臣覆奏謝旻摺內欽奉
諭旨今命往江西署理巡撫印務可竭力訓練之欽此
臣伏念謝旻蒙

皇上補授太常寺卿不旬日間又蒙

皇上命往江西署理撫印

天恩稠疊實逾格外臣見其聞

命之下感激之至更深惶悚臣業已勉其立志堅定存

心公正不恤勞瘁不避嫌怨以仰報

聖恩謝旻甚以臣言為然今伊現在豫省交代候
已有旨不令來京陛見矣
旨陛見仰請

聖訓臣欽遵

諭旨自當竭力訓勉以仰副我

皇上造就人材之

聖意又於臣奏豫省秋禾收成摺內欽奉

諭旨今歲農事如是豐穰固屬可慶不待言矣我君臣
又當加勉若何修省以為來歲感格

上天慈佑

聖祖垂庇之道朝夕乾惕寧容少間欽此除東省秋禾收

成另摺恭

天祖天祖

奏外臣查豫省數年以來豐登屢慶而東省今歲收
昨據費金吾奏稱田夫野老咸言自康熙四十一年至
成亦較勝於上年此皆仰賴我
今未經似此豐熟云云此實休徵協應見於豫省朕是
皇上德盛化神感格
以倍增寅畏而感戴

是以雨暘時若萬寶告成伏讀
之垂恩篤厚也共仰加勉之念洵有不期然而然者
諭旨又以來歲感格之道

訓勉微臣益見

聖敬日躋

聖德日新實為從古聖帝明王所未有臣惟有敬佩

聖訓永矢勿怠焉耳又於臣奏請改造倉廩摺內欽奉諭旨改造倉廩極屬應行之舉但每間止估工料銀十五兩為數太少恐不敷用既議興修當令堅固若草率了事仍未能抵禦風雨非經久計也凡類斯裨益積貯政務切不可惜費卿其誌之欽此仰見我

皇上舉行善政不惜帑金

聖心廣大覆載為量臣欽奉

諭旨即檄行布政司動支河北捐納公費項下給發改
造務期上下堅固可禦風雨可垂經久其前估十
五兩之數不敷所用再行酌量加添臣惟敬誌
聖訓凡遇地方應舉之事固不敢任屬員冒濫糜費
國帑亦不敢苟簡從事以致草率總期辦理從容規
模宏遠以昭

好聖朝百度維新之

盛典也所有奉到各原摺理合恭繳為此謹

奏

覽奏俱悉

卿所薦鄒朝鼎多有人稱道其好朱綱亦曾保奏昨到京引見觀其舉止應對甚屬庸平或忠厚穩妥則有之若論才具恐未必能勝延平繁劇之任諒必有見長於卿處方始推薦朕竟不能品定伊之優劣卿意究以為何如人耶

硃批諭旨卷一百二十六之十七